


«Decidì vegn ils diesch da zercladur»

Ils resultats da la retschertga na pon betg starmentar il candidats per la regenza

DAD ANDREAS CADONAU / ANR

■ **Christian Rathgeb e Mario Cavigelli èn sin buna via vers la reelecziun en la regenza grischuna, il cumbat per ils ulteriurs sez è anc avert. Jon Domenic Parolini patescha actualmeins da las discussiuns pertutgant las convengnas da pretsch da la branscha da construcziun e surstar fa la flaiveltezza momentana dal candidat da la partida populara, Walter Schlegel.** La retschertga davart las elecziuns da la regenza grischuna publitgada ier han fatg surstà principalmain pertutgant il support actual dal candidat da la partida populara svizra, Walter Schlegel. Cun ina cumpart da 33,3 procent da las vuschs calculadas sin fundament da la retschertga tar 1495 persunas chatta il schef da la polizia chantunala grischun il pli pitschen support. Il candidat da la pps retschaiva momentan memia pauc sustegn da las ulteriuras partidas burgaisas, principalmain da la partida burgais-democrata e da la partida cristiandemocrata mo era ils adherents da l'atgna partida na persvada el betg cumplain. Cun intgina surpraisa ha Walter Schlegel pri per enconuschientscha dal resultat da la retschertga sco el ha ditg, ed explitgà ch'i saja grev da valitar la situaziun sin fundament d'ina enquista, crai dentant dat esser in pau ina unfrenda da las publicaziuns en connex cun il cartel da la branscha da costruziun. Publicaziuns ch'el valitescha per part da n'esser stadas fitg fairas, principalmain da cumbinar lavur da polizia cun il scan-

Intenziuns d'elecziun: resultat total



Funtauna: grafica La Quotidiana

* Resultat retschertga parziala

Anc restan trais emnas per volver il char en la direenziun garegiada. Per trais dals sezs en la regenza grischuna e la cursa averta.

dal da cartel. Sper il grond sustegn da l'atgna partida d'astgan ils dus cusseglier en uffizi, *Christian Rathgeb* e *Mario Cavigelli* profitan dal support dad adherents dad autras partidas. Quai vala principalmain per *Christian Rathgeb* che retschai va vuschs ord l'intschess da tuttas partidas e dastga quintar tenor retschertga cun in sustegn da 61,8 procent da las vuschs e *Mario Cavigelli* 58,1 pertschient. *Cavigelli* è satisfatg dal resultat intermediar na da la retschertga, è dentant pertschart da l'impurtanza da las emnas proximas e spera, sco el ha ditg, sin il sustegn dal suveran ils 10 da zercla-

dur. *Christian Rathgeb* ha menziunà da giudair il cumbat electoral cun bleras occurrenzas en l'entir chantun che porschian blers inputs. *Retschertgas* na vul el dentant betg survaletar e regorda a sia elecziun da 2006 en il cussegl grond. Ina elecziun dumagnada la finfinala cun in surpli da quatter vuschs.

Porscher svelta ina survista

In pau auter sa preschenta la situaziun tar l'ulteriur cusseglier guvernativ en uffizi, *Jon Domenic Parolini* da la pbd. Bain figurescha el sin il terz plaz da la retschertga, cun 42,8 procent perda el dentant

ina pulita part dal electorat vers ses dus collegas en la regenza grischuna. Cler che las discussiuns davart las convengnas da pretsch da la branscha da construcziun e la retirada da l'ulteriur candidat da la pbd ha laschà sminuir il support per *Jon Domenic Parolini*. Quai fatg conferma il cusseglier guvernativ e candidat sin dumonda. Per el esi impurtant da porscher aschi svelt sco pussaivel ina survista da tuttas circumstanças per che la publicitad possia far in meglier purtret da la situaziun. *Jon Domenic Parolini* ha explitgà dad esser respunsabels per in departement cun delicats dossiers la la pro-

moziun d'economia che procurian adina per discussiuns. Ils ulteriurs candidats

Peter Peyer da la ps e *Marcus Caduff* da la pcd èn cun 38,5 e 38,3 procent datiers al candidat da la pbd. Quai vala medemamain per il candidat independent *Linard Bardill* che suanda cun 36,5 procent. Ses resultat e dentant da resguardar cun resalvas sco quai ch'els auturs da la retschertga inditgeschan sez. Pervia da l'annunzia da sia candidatura a curta vista n'è il resultat betg tant represchentativ. En scadin cas e la cursa per trais sezs da la regenza grischuna anc averta.

Confirmà l'atgna opiniun


A *Peter Peyer* ha la retschertga confermà sia opiniun che la cursa è diltuttatfatg averta ed ella intimescha il candidat da la ps da s'engaschar cumplainamain per segirar a la ps in sez en la regenza. *Marcus Caduff* ha medemamain pri per enconuschientscha ils resultats ed ha puntuà ch'i sa tractia d'ina retschertga che conferma pli u main las atgnas supposiziuns. Elegi vegnia la finfinala ils 10 da zercladur ed el saja motivà per la fin dal cumbat electoral. El sto probabel anc augmentar sia enconuschientscha ordvart da la Surselva. En la rangaziun da l'enconuschien-tscha dals politichers grischuns medemamain eruida da la retschertga sa chatta il candidat da la pcd a la fin. Il candidat independent *Linard Bardill* n'è deplorablmain betg stà cuntanschibel per ina reacziun sin ils resultats da la retschertga.

Parolini sto cumbatter - Rathgeb e Cavigelli oravant

■ (rtr) Tut ils trais cussegliers guvernativs actuals vegnissan reelegids. Quai mussa ina retschertga che l'institut Sotomo ha fatg per incumbensa dad RTR, Samedia e dal schurnal regiunal da radio SRF. Las pli bleras vuschs survegniss

Christian Rathgeb (pld) cun 61.8%. Ad el sin ils chaltgogns è *Mario Cavigelli* (pcd) cun 58.1%.

Jon Domenic Parolini perencunter survegniss marcantamain pli paucas vuschs, numnadamain 42%.




L'affera da cartel ha in'influenza

Ina procentuala sut 50% hajan normalmain plitost candidats novs, declera il politolog da Sotomo *Michael Hermann*. Che *Jon Domenic Parolini* survegnia actualmain bler pli paucas vuschs ch'els dus auters cussegliers guvernativs en uffizi haja segir da far cun l'affera da cartel en la branscha da construcziun en l'Engiadina.

La retschertga mussa dentant era dander che las vuschs vegnan: Dad electurs burgaisdemocraticis survegn *Jon Domenic Parolini* 83% da las vuschs. Il po-

litolog *Michael Hermann* fa quai surstar: Quai saja pli bass che tar ses dus collegas d'uffizi e quests resultats mussian plitost in maletg d'in candidat nov e betg d'in cusseglier guvernativ ch'è gia 4 onns en uffizi.

Christian Rathgeb giuda il sustegn da 92% or da la partida liberaldemocratica e *Mario Cavigelli* elegessan perfin 94% da la partida cristiandemocratica. Ad omadus strategia quai dentant era da recaltgar bleras vuschs ord autras partidas – a *Jon Domenic Parolini* plitost betg.



Christian Rathgeb e Mario Cavigelli han grond sustegn dad electurs ord lur atgna partida.

GRAFICAS RTR

Cumbat piz a cup tranter ils 4 candidats novs

Peter Peyer (ps) e *Marcus Caduff* (pcd) cumpletteschan la regenza grischuna, sch'i va tenor ina retschertga che l'institut sotomo ha fatg per incumbensa dad RTR e Samedia. Igl è dentant da dir ch'era *Linard Bardill* (independent) e *Walter Schlegel* (pps) han schanzas.

Duas persunas èn actualmain cler a la testa: *Christian Rathgeb* (pld) vegn sin 61.8% da las vuschs e *Mario Cavigelli* sin 58.1%. Sin piazza trais suonda cun retard *Jon Domenic Parolini* (pbd) che cuntanscha 42% da las vuschs. Ils candidats novs n'èn dentant betg lunsch davos *Parolini*.

Ps defenda ses sez – pcd cun dus sezs

Dals candidats novs survegn *Peter Peyer* (ps) las bleras vuschs cun 38.5%, suonda da *Marcus Caduff* (pcd) cun 38.3%. Omadus èn cunquai sin ils chaltgogns dal cusseglier guvernativ *Jon Domenic Parolini*. *Peter Peyer* profitescha dal fatg ch'el è il sulet candidat socialdemocrat aifer ils

candidats burgais. Ord sia partida survegn el grond sustegn: 91% dals electurs da la ps han l'intenziun da vuschar per el. Tenor la retschertga pudess *Marcus Caduff* ademplir a sia partida il giavisch da reconquistar in segund sez en la regenza grischuna, sper quel da *Mario Cavigelli*. Per il politolog da sotomo *Michael Hermann* ha *Marcus Caduff* dentant anc in deficit: El è pli pauc enconuschent en il Grischun ch'els auters candidats.

Linard Bardill ha schanzas

Era sch'el ha annunzià sia candidatura pir tard – l'independent *Linard Bardill* ha schanzas da vegnir elegi ils 10 da zercladur en la regenza grischuna. El survegn 36.5% da las vuschs. Il politolog fa dentant attent che quests resultats sajan pli malsegirs che quels dals auters candidats, cunquai che sia candidatura saja vegnida enconuschenta pir durant che la retschertga girava gia.

La retschertga da Sotomo

La retschertga è vegnida fatga tranter ils 4 ed ils 14 da matg 2018 e quai via las paginas d'internet dad RTR e Samedia e cun in pool dad email da Sotomo.

En tut èn vegnidas dumandadas 1495 persunas. Damai che la candidatura da *Linard Bardill* è vegnida enconuschenta durant la retschertga, è l'evaluaziun succedida en duas parts. Per l'evaluaziun parziala sunter la candidatura da *Linard Bardill* èn vegnidas dumandadas 538 persunas.

La quota da malsegirtad munta a +/-3.16%. Tar ils resultats da *Linard Bardill* po quella quota esser pli auta.

